



KENYATAAN MEDIA
MENTERI DI JABATAN PERDANA MENTERI (HAL EHWAL AGAMA)

**MALAYSIA ANGKAT WACANA ILMU DAN PEMIKIRAN ISLAM KE
PERSADA ANTARABANGSA MELALUI PERSIDANGAN IIFA KE-27**

21 SEPTEMBER 2026 / 9 RABIULAKHIR 1448

1. Kerajaan MADANI melalui Jabatan Perdana Menteri (Hal Ehwal Agama) akan menganjurkan Persidangan Akademi Fiqh Islam Antarabangsa (IIFA) Ke-27 pada 16 hingga 20 November 2026 di Putrajaya, dengan kerjasama International Islamic Fiqh Academy (IIFA). Persidangan ini akan menghimpunkan para ulama, cendekiawan dan pakar dari negara-negara anggota Pertubuhan Kerjasama Islam (OIC).
2. Penganjuran ini, menzahirkan komitmen kerajaan dalam memperkasa ilmu pengetahuan, pemikiran dan kepakaran sebagai asas membina masyarakat yang berilmu, beretika dan sejahtera, di samping memperkukuh peranan ilmu Islam dalam mendepani perubahan dunia. Bertemakan “Mensejahterakan Masyarakat dan Memperkasa Nilai Madani”, persidangan ini akan menggengbleng kepakaran dunia Islam untuk meneliti cabaran semasa dan merumuskan penyelesaian yang memberi manfaat kepada masyarakat dan umat.
3. Antara isu yang akan diberikan perhatian termasuk kecerdasan buatan (AI), penyuntingan genetik dan teknologi DNA, halal, etika penjagaan kesihatan dan perubatan, cabaran sosial dan etika, komunikasi serta media dalam era digital dan kewangan sosial Islam. Perbincangan akan berasaskan sumber dan prinsip Syariah, mengambil kira realiti semasa serta dipandu oleh Maqasid al-Syariah, Ijtihad Jama’i dan Wasatiyyah, agar kemajuan ilmu, sains dan teknologi sentiasa seiring dengan nilai, etika dan kemaslahatan manusia.
4. Dalam konteks Malaysia sebagai sebuah negara majmuk, persidangan ini turut mengetengahkan Fiqh Ta’ayush atau fiqh kehidupan bersama sebagai asas membina keharmonian, saling menghormati dan kerukunan hidup. Pengembangan pemikiran ini amat penting bagi membentuk masyarakat yang berteraskan ilmu, adab, keadilan dan kemaslahatan, di samping memperkukuh kefahaman yang dapat membendung pemikiran ekstrem dan melampau.

5. IIFA ke-27 bakal memperkukuh peranan Malaysia dalam jaringan keilmuan dan kepakaran dunia Islam, di samping berkongsi pengalaman negara dalam pembangunan institusi Islam dan pengurusan masyarakat majmuk. Ini selari dengan aspirasi Malaysia MADANI untuk mengimbangi kemajuan dengan nilai, kemanusiaan dan kesejahteraan bersama.

6. Sebagai sebuah kerajaan yang menjunjung nilai ilmu dan ketamadunan, penganjuran ini bukan sekadar sebuah persidangan, tetapi sebagai pelaburan terhadap masa depan ilmu dan umat. Kita mahu Malaysia menjadi tempat ilmu bertemu, pemikiran berkembang dan kepakaran digembleng untuk menghasilkan gagasan yang memberi manfaat kepada manusia.

YB Senator Dr. Zulkifli Hasan

Menteri di Jabatan Perdana Menteri (Hal Ehwal Agama)

PUTRAJAYA